

SAMÞYKKT

um hunda- og kattahald í Húnaþingi vestra.

I. KAFLI

Hundahald.

1. gr.

Hundahald á þéttbýlisstöðum í Húnaþingi vestra sætir þeim takmörkunum sem fram koma í samþykkt þessari. Þéttbýlisstaðirnir sem hér um ræðir eru Hvammstangi, Laugarbakki og Borðeyri.

2. gr.

Sveitarstjórn veitir lögráða einstaklingum sem búa í sveitarfélaginu leyfi til hundahalds. Leyfi er bundið við nafn og heimilisfang eiganda og er óheimilt að framselja það. Leyfi er einnig bundið við þann hund sem sótt er um leyfi fyrir hverju sinni. Leyfi er háð eftirfarandi skilyrðum:

- a) Ef sótt er um leyfi til að halda hund í fjölbýlishúsi skal skriflegt samþykki 2/3 íbúðareigenda með sameiginlegan inngang eða stigagang fylgja umsókn, sbr. 33. gr. a. laga nr. 26/1994 um fjöleignarhús.
- b) Hundar skulu vera ormahreinsaðir ár hvert á nánar auglýstum tíma. Gjald vegna ormahreinsunar er innifalið í leyfisgjaldi vegna hundsins.
- c) Sveitarfélagið sér um að ábyrgðartryggja þá hunda sem þeir gefa út leyfi fyrir. Ábyrgðartryggingin skal vera innifalin í greiðslu árlegs leyfisgjalds.
- d) Hundar skulu vera örmerktir og ávallt bera ól um hálsinn. Á ólinni skal vera plata sem í er grafið skráningarnúmer hundsins.
- e) Óheimilt er með öllu að láta hunda ganga lausa innan marka þéttbýlis nema nytjahunda þegar þeir eru að störfum og í gæslu eiganda eða umráðamanns. Hundar skulu að öðru leyti ávallt vera í taumi utanhúss og í fylgd manneskju sem hefur fullt vald yfir þeim. Þegar hundur er í festi á lóð skal lengd festarinnar við það miðuð að óhindrað megi ganga að aðaldyrum húss. Eiganda eða umráðamanni hunds er alltaf skylt að fjarlægja saur eftir hundinn.
- f) Eiganda eða umráðamanni hunds ber að sjá svo um að hundurinn valdi ekki hættu, óþægindum eða óþrifnaði eða raski ró manna.
- g) Óheimilt er að hleypa hundum inn í húsrými eða á lóðir sem fjallað er um í fylgiskjali 3 í reglugerð nr. 941/2002 um hollustuhætti. Um matvælaafyrirtæki fer samkvæmt ákvæðum reglugerðar nr. 103/2010 um gildistöku reglugerðar Evrópuþingsins og ráðsins (EB) nr. 852/2004 um hollustuhætti sem varða matvæli.

Framangreindir staðir eru m.a. eftirfarandi:

1. Vatnsveitur, vatnsból og verndarsvæði þeirra, brunnar og sjóveitur.
 2. Almennings- og útsalerni.
 3. Hvers konar sorpgeymslu- og sorpförgunarstaðir.
 4. Gististaðir, veitingastaðir og matsölustaðir.
 5. Tjald- og hjólhýsasvæði, nema samkvæmt ákvörðun umsýjónaraðila.
 6. Húsakynni þar sem geymd eru, framleidd eða seld matvæli.
 7. Skólar, kennslustaðir, barnaheimili og gæsluvellir.
 8. Rakarastofur, hárgreiðslustofur, hvers konar snyrtistofur og sólbaðsstofur.
 9. Heilbrigðisstofnanir, hæli, heilsuræktar- og íþróttastöðvar og baðstaðir.
 10. Fangelsi og aðrar vistarverur handtekinna manna.
 11. Samkomuhús hvers konar og almennar skrifstofur.
 12. Kirkjugarðar, bálstofur, líkhús og líkgeymslur.
 13. Almenn samgöngutæki.
- h) Ákvæði g-liðar hér að framan eiga ekki við um nytjahunda að störfum.
 - j) Óheimilt er að láta hund dvelja lengur en einn mánuð á heimili án þess að sótt sé um leyfi fyrir honum.
 - k) Óheimilt er að hafa fleiri en þrjá hunda eldri en þriggja mánaða á sama heimili. Heimilt er að veita undanþágu frá þessu ákvæði í sérstökum tilfellum, svo sem ef um er að ræða starfsemi þar

sem hundar eru haldnir til undaneldis, sbr. reglugerð nr. 1077/2004 um aðbúnað og umhirðu gæludýra og dýrahald í atvinnuskyni.

3. gr.

Umsókn um leyfi til hundahalds skal skila til skrifstofu sveitarfélagsins á þar til gerðu eyðublaði. Með undirritun umsóknar skuldbindur umsækjandi sig til að hlíta í einu og öllu fyrir mælum samþykktar um hundahald. Sveitarstjóri eða fulltrúi hans afgreiðir umsóknir um leyfi til hundahalds. Leyfishafi fær afhenta plötu, sbr. ákvæði d-liðar í 2. gr. Sé leyfis ekki vitjað innan mánaðar eftir útgáfu þess fellur það sjálfkrafa úr gildi. Leyfishafi skal tilkynna sveitarfélaginu ef hundurinn drepst eða er fluttur úr sveitarfélaginu.

4. gr.

Hunda sem ganga lausir utanhúss í þéttbýli skal handsama og færa í sérstaka geymslu á vegum sveitarfélagsins. Sama gildir um hættulega hunda og þá sem ekki hefur verið veitt leyfi fyrir. Kostnaður við töku og geymslu hunds skal að fullu greiddur af eiganda. Heimilt er að afhenda hund úr geymslu sveitarfélagsins hafi viðkomandi fengið útgefið leyfi fyrir hundinum innan sjö sólarhringa frá því að hundurinn er kominn í vörslu eftirlitsmanns, enda hafi áfallinn kostnaður vegna handsömunar og geymslu hundsins verið greiddur af eiganda. Að öðrum kosti er heimilt að aflífa hundinn að sjö sólarhringum liðnum eða ráðstafa til nýs eiganda, enda hafi eiganda verið tilkynnt um töku hundsins ef unnt er.

Hunda sem ráðast á menn eða skepnur og bita skal fjarlægja og er lögreglu og eftirlitsmanni heimilt að láta lóga þeim þegar í stað, sbr. 8. gr. reglugerðar nr. 1077/2004 um aðbúnað og umhirðu gæludýra og dýrahald í atvinnuskyni.

Hunda sem hætta er talin stafa af, sbr. þá sem ráðast á menn eða skepnur, skal tilkynna til lögreglu þegar í stað, fjarlægja þegar í stað og færa í vörslu hundaeftirlitsmanns. Séu slíkir hundar teknir í vörslu taka lögreglustjóri og hundaftirlitsmaður ákvörðun um það hvernig með þá skuli farið. Heimilt er að fyrirskipa aflifun hættulegs hunds, sbr. 8. gr. reglugerðar nr. 1077/2004.

II. KAFLI

Kattahald.

5. gr.

Kattahald á þéttbýlisstöðum í Húnaþingi vestra sætir þeim takmörkunum sem fram koma í samþykkt þessari. Þéttbýlisstaðirnir sem hér um ræðir eru Hvammstangi, Laugarbakki og Borðeyri.

6. gr.

Sveitarstjórn veitir lögráða einstaklingum, sem búa í sveitarfélaginu, leyfi til kattahalds. Leyfið er bundið við nafn og heimilisfang eiganda og er óheimilt að framselja það. Leyfið er einnig bundið við þann kött sem sótt er um leyfi fyrir hverju sinni. Leyfið er háð eftirfarandi skilyrðum:

- a) Ef sótt er um leyfi til að halda kött í fjölbýlishúsi skal skriflegt samþykki 2/3 íbúðareigenda með sameiginlegan inngang eða stigagang fylgja umsókn, sbr. 33. gr. a. laga nr. 26/1994 um fjöl-eignarhús.
- b) Kettir skulu vera hreinsaðir af ormum svo og öðrum snikjudýrum sem máli skipta. Skila þarf staðfestingu dýralæknis um ormahreinsun til skrifstofu sveitarfélagsins fyrir 1. apríl ár hvert.
- c) Sveitarfélagið sér um að ábyrgðartryggja þá ketti sem þeir gefa út leyfi fyrir. Ábyrgðartryggingin skal vera innifalin í greiðslu árlegs leyfisgjalds.
- d) Kettir skulu vera örmerktir og ávallt bera ól um hálsinn. Á ólinni skal vera plata, sem í er grafið skráningarnúmer kattarins.
- e) Eiganda eða umráðamanni kattar ber að sjá svo um að kötturinn valdi ekki hættu, óþægindum eða óþrifnaði eða raski ró manna.
- f) Óheimilt er að láta kött dvelja lengur en einn mánuð á heimili án þess að sótt sé um leyfi fyrir honum.

- g) Óheimilt er að hafa fleiri en þrjá ketti eldri en þriggja mánaða á sama heimili. Heimilt er að veita undanþágu frá þessu ákvæði í sérstökum tilfellum, svo sem ef um er að ræða ræktun katta í atvinnuskyni.
- h) Eigendum og umráðamönnum katta ber að taka tillit til fuglalífs á varptíma og eftir atvikum takmarka útiveru katta, m.a. að næturlagi.
- i) Ekki má hleypta köttum inn í húsrými eða á lóðir sem fjallað er um í fylgiskjali 3 í reglugerð um hollustuhætti. Um matvælafyrirtæki fer samkvæmt ákvæðum reglugerðar um gildistöku reglugerðar Evrópuþingsins og ráðsins (EB) nr. 852/2004 um hollustuhætti sem varða matvæli. Ekki má heldur hleypta köttum inn í húsnæði vatnsveitna.

7. gr.

Umsókn um leyfi til kattahalds skal skila til skrifstofu sveitarfélagsins á þar til gerðu eyðublaði. Með undirritun umsóknar skuldbindur umsækjandi sig til að hlíta í einu og öllu fyrir mælum samþykktar um kattahald. Sveitarstjóri eða fulltrúi hans afgreiðir umsóknir um leyfi til kattahalds. Leyfishafi fær afhenta plötu, sbr. ákvæði d-liðar 6. gr. Sé leyfis ekki vitjað innan mánaðar eftir að það er veitt fellur það sjálfkrafa úr gildi. Leyfishafi skal tilkynna sveitarfélaginu ef kötturinn drepst eða er fluttur úr sveitarfélaginu.

8. gr.

Eftirlitsaðila er heimilt að láta lóga ómerktum köttum, sbr. 8. gr. reglugerðar nr. 1077/2004 um aðbúnað og umhirðu gæludýra og dýrahald í atvinnuskyni.

III. KAFLI

Eftirlit o.fl.

9. gr.

Heilbrigðisnefnd Norðurlands vestra hefur eftirlit með samþykkt þessari. Tæknideild starfar í umboði sveitarstjórnar og hefur eftirlit með framkvæmd hundahalds og kattahalds í umboði heilbrigðisnefndar og getur leitað aðstoðar lögregluþingvalda þegar þess er þörf.

Sveitarstjórn felur tæknideild fyrir hennar hönd að sjá um að ákvæðum samþykktar þessarar sé framfylgt. Heimilt er að skipa fleiri en einn aðila til verksins og setur sveitarstjórn nánari starfsreglur.

Halda skal skrá yfir þá hunda og ketti sem afskipti eru höfð af. Á skrifstofu sveitarfélagsins skal færa upplýsingar um útgefin leyfi vegna hunda og katta. Þar skal einnig skrá nafn og heimilisfang leyfishafa. Tæknideild skal árlega senda umhverfisnefnd skrá yfir leyfða hunda og ketti.

10. gr.

Sveitarstjórn skal, að fenginni umsögn heilbrigðisnefndar, setja gjaldskrá vegna eftirlits með hundum og köttum í samræmi við ákvæði 25. gr. laga nr. 7/1998 um hollustuhætti og mengunarnáttur. Í gjaldskránni skal kveðið á um gjald til sveitarstjórnar vegna útgáfu og endurnýjunar leyfis til hunda- og kattahalds. Gjaldið skal greitt fyrirfram í fyrsta sinn við skráningu dýrsins til næsta maí-mánaðar og síðan árlega 1. maí fyrir eitt ár í senn. Hafi gjaldið ekki verið greitt innan tveggja mánaða frá gjalddaga fellur leyfið til hunda- eða kattahalds sjálfkrafa úr gildi. Í gjaldskránni skal einnig kveðið á um greiðslu eigenda hunda og katta á kostnaði vegna annarra gjaldaliða sem leiða af samþykkt þessari.

Sveitarstjórn skal láta birta gjaldskrá í B-deild Stjórnartíðinda. Gjöld mega aldrei vera hærrí en sem nemur rökstuddum kostnaði við veitta þjónustu eða framkvæmd eftirlits með einstökum þáttum.

Sveitarstjórn er heimilt að fella niður eða ákveða lægra gjald fyrir nýttjáhunda, svo sem hunda sem notaðir eru til löggæslu eða björgunarstarfa og minkahunda. Af leiðsöguhundum sem blindir eða sjónþaprir nota vegna fötlunar sinnar skal ekki greiða gjald.

11. gr.

Eigendur eða umráðamenn hunda eða katta sem brjóta gegn ákvæðum samþykktar þessarar skulu sæta skriflegri áminningu af hálfu heilbrigðisnefndar og gefinn hæfilegur frestur til úrbóta. Ef

eigandi eða umráðamaður hunds eða kattar vanrækir skyldur sínar eða brýtur ítrekað gegn ákvæðum samþykktar þessarar eða öðrum reglum sem gilda um hunda- og kattahald getur sveitarstjórn afturkallað leyfi hans til hunda- eða kattahalds. Skal leyfishafi þá afhenda dýrið starfsmanni tæknideildar. Einnig getur sveitarstjórn afturkallað öll leyfi til hundahalds og kattahalds telji hún þess brýna þörf. Leyfishafa ber ætíð að greiða kostnað sem leiðir af broti á samþykkt þessari.

12. gr.

Sinni leyfishafi samkvæmt samþykkt þessari ekki skriflegri áminningu eða brjóti endurtekið af sér er heilbrigðisnefnd heimilt að beita hann dagsektum þar til úr er bætt eða beita þvingunarúrræðum í samræmi við ákvæði VI. kafla laga nr. 7/1998 um hollustuhætti og mengunarvarnir.

Með brot á samþykkt þessari skal fara samkvæmt ákvæðum laga nr. 7/1998 um hollustuhætti og mengunarvarnir.

13. gr.

Samþykkt þessi staðfestist hér með samkvæmt 25. gr. laga nr. 7/1998 um hollustuhætti og mengunarvarnir til þess að öðlast þegar gildi. Frá sama tíma falla úr gildi samþykktir nr. 167/2000 um hundahald í Húnaþingi vestra og nr. 172/2000 um kattahald í Húnaþingi vestra.

Umhverfis- og auðlindaráðuneytinu, 15. mars 2013.

F. h. r.

Sigurbjörg Sæmundsdóttir.

Kjartan Ingvarsson.